

## DOMINGU VIII TEMPU KOMÚN – TINAN C

### Tema

Tema sentrál liturjia domingu ne'e nian konvida ita atu reflète kona-ba kestaun ida-ne'e: buat ne'ebé hakonu fuan no ita fó sasin mak lia-loos Jezús nian, ka ita-nia interese no ita-nia kritériu egoísta sira?

*Evanjellu* fó mai ita kritériu sira atu dixerne “mestre” loos husi ida falsu: “mestre” loos mak ida ne'ebé apresenta Jezús nia proposta hodi hamosu komuñau, uniaun, fraternidade, domin ho ninia sasin; “mestre” falsu mak ida-ne'ebé hatudu intoleránsia, ipokrizia, autoritarizmu no ninia sasin hamosu divizaun no konfuzau sira: ninia anúnsiu la iha ligasaun ida ho Jezús.

*Leitura dahuluk*, iha liña hanesan, fó konsellu ida prátiiku liu, maibé mós útil liu: ita labele julga ema sira ho impresaun dahuluk ka tan atitude sira maizumenu teatrál sira: ita husik sira ko'alia, basá liafuan sira hatudu lia-loos ka lia-bosok ne'ebé iha fuan laran.

*Leitura daruak* aparentemente la iha ligasaun ho temátika ida-ne'e: leitura ne'e mak konkluzau ba Paulo nia katekze kona-ba moris-hi'as. Maski nune'e, ita bele dehan katak moris no fó sasin ho lia-loos, sinseridade no koerénsia kona-ba Jezús nia proposta mak dalan nesesáriu ba moris nakonu ne'ebé Maromak rezerva mai ita. Husi ita-nia anúnsiu sinseru kona-ba Jezús, mak moris komunidadé ida-ne'e.

### LEITURA I – Sir 27, 4-7

Livru Ben Sira (Eclesiástico) mosu iha inísiu sékulu II mK., durante seleúsida sira nia ukun. Époka ida iha-ne'ebé elenizmu buka impoin ho agresividade ninia an, hodi muda Maromak nia Povu nia identidade. Jezús Ben Sira, autór livru ne'e nian, preokupadu ho degradasaun valór tradisionál sira ninia Povu nian; nia hakerek kompéndiu “sabadouria” nian ida-ne'e atu defende Israel nia patrimóniu kulturál no relijiozu no atu hatudu ba ninia kompatriota sira katak Israel soi iha “Torah”, Maromak raisk mak revela, “sabadouria” lolos – “sabadouria” ida boot liu “sabadouria” grega.

Testu ne'ebé liturjia ohin nian propoin mai ita mak ezemplu klásiku reflesaun sapiensiál. Nia apresenta lia dadolin ida reflesaun matenek nian, mai husi esperiénsia prátiika no reflesaun rasik (“keta gaba lai ema ruma molok nia ko'alia”); nia finalidade mak orienta ema nia komportamentu, hodi proteje nia husi insusesu, frakasu, komportamentu no hanoin la loos.

### MENSAJEN

Hodi uza ilas tolu (peneira, bainhira doko, hatudu trigu ne'ebé la moos; fornu, ne'ebé obriga vazú badaen nian atu hatudu exelénsia; ai-fuan ne'ebé revela qualidade to'os nian), Jezús Ben Sira hanorin katak liafuan revela momoos ema nia fuan nia laran. Ema bele finji, lohi, haksumik, sai atór no apresenta tipu komportamentu nian... Maibé liafuan hatudu nia no hatudu momoos ninia sentimentu kle'an liu sira.

Konkluzau: ita labele husik impresaun atu kondisiona ita, ka jestu sira maizumenu teatru nian ne'ebé la signifika buat ida: liafun de'it mak espresa abundánsia fuan nian.

## **LEITURA II – 1 Cor 15, 54-58**

Testu ne'e konklui katekeze ne'ebé ita haree iha domingu haat ikus ne'e kona-ba moris-hi'as. Ema sarani sira Corinto nian– preokupadu ho imposibilidade aparente katak isin, sensuál no materiál, atu iha asesu ba moris nakonu ho Maromak – kona-ba moris-hi'as, Paulo dezenvolve ninia katekeze kona-ba kestaun ida-ne'e, Iha-ne'e ita haree oinsá difikuldade kristiniazmu nian (ho abut judaiku) atu adapta ba realidade diferente – realidade kultura no valór eléniku sira.

### *MENSAJEN*

Iha finál katekeze nian, Paulo rejista katak buat ne'ebé desizivu mak mate la iha ona kbiit ba nafatin. Iha relasaun ho Kristu nune'e mós iha relasaun ho sarani sira, la'ós “oinsá” moris-hi'as mak inportante, maibé faktu moris-hi'as ne'e rasik. Ba Paulo, faktu ne'e realidade ida labele halakon no labele duvida.

Tanba ne'e mak Paulo festeja ho knananuk ida – maski ki'ik-oan – Kristu no sarani sira nia vitória hasoru mate. Nia ba foti testu bíbliku sira Isaías nian (kf. Is 25, 8) no Oseias nian (kf. Os 13, 14), maski interpreta livremente: “Oh mate, iha-ne'ebé ó-nia vitória? Oh mate, iha-ne'ebé ó-nia daun?” (1 Cor 15 ,54-55). Salan, moris-atan, egoízmu, violénsia, ódiu, mate nia aliadu sira husi ohin bao in la iha ona kbiit hasoru ema: Kristu nia moris-hi'as liberta sarani hotu husi ta'uk mate nian, basá nia hatudu katak la iha mate ba ida-ne'ebé luta ba mundu ida jusitsa nian, domin nian no dame nian. Knananuk manán nian lori nu'udar akompañamentu obrigatóriu, agradesimentu ba Maromak basá Nia mak Na'i moris nian, “ne'ebé haraik votória mai ita hodi Na'i Jezús Kristu” (1 Cor 15, 57).

Paulo nia laifuan ikus atu konvida sarani Corinto nian – no fiar-na'in sira tempu hotu nian – atu metin “firme no la nakdoko, badinas ba beibeik iha Na'i nia obra” (1 Cor 15, 58). Ne'e mak konvite ida atu keta projeta moris-hi'as iha mundu futuru de'it, maibé atu serbisu loron ba loron atu moris-hi'as (nu'udar libertasaun husi salan, husi egoízmu, husi esplorasau no mate) sai realidade moris nian iha istória ita-nia ezisténisa nian. Ne'e implika atu la dobra liman hodi la halo buat ida, maibé haka'as an loloos iha transformasaun ne'ebé lori moris foun ba ema no ba mundu.

## **EVANJELLU – Lc 6, 39-45**

Ita sei kontinua iha ambiente “diskursu iha rai-tetuk”, iha-ne'ebé Jezús prezenta elementu fundamentál sira ezisténsia sarani nian.

Provavelmente, Lucas tau hamutuk iha ne'e fraze sira ne'ebé Jezús ko'alia iha kontestu no tempu lahanesan.

Maski nune'e ita haree Lucas preokupa ho “mestre falsu sira”. Testu ohin nian hahú ho provérbu ida (“ema matan-delek bele gia matan-delek seluk?” – vers. 39) ne'ebé Mateus tau iha kontestu seluk husi Lucas nian: iha Mateus (kf. Mt 15,14) kontestu mak kítika ba farizeu sira, fó hanoin kona-ba mestre falsu sira comunidade sarani nian. Lucas hakarak aviza comunidade kona-ba mestre falsu sira ne'e, ne'ebé iha tinan 80 hahú mosu no sira-nia doutrina la'o sees husi esensiál mensajen Jezús nian.

### *MENSAJEN*

Tuir Lucas, mestre loos mak nafatin dixípulu ida Jezús nian, mestre boot liu; doutrina ne'ebé nia hanorin labele sees husi Jezús nia hanorin (vers. 39-40). Bainhira ema ida apresenta ninia doutrina rasik no la'ós Jezús nian, nia halo maun-alin sira lakon dalan. Komunitade tenke hanoin nafatin ida-ne'e, atu keta husik ema lori nia husi dalan ne'ebé hadook nia husi dalan loos, katak, Jezús.

Daruak, nia ko'alia kona-ba maun-alin sira nia julgamentu (vers. 41-42). Iha comunidade sarani eziste ema sira ne'ebé konsidera an simu naroman, ne'ebé “nunika sala no la iha dúvida”, ezijente liu ba ema seluk, ne'ebé la haree uluk sira nia an bainhira kritika ema seluk... Sira hatudu an seguru liu kona-ba an rasik, dalaruma ho atitudo sira autoridade nian, orgullu, prepoténsia no la iha kapasidade atu aplika ba an rasik kritériu sira ne'ebé sira ezije husi ema seluk. Sira ne'e mak ipókrita sira: liafuan ne'ebé la hatudu de'it ema falsu, ne'ebé hahalok la la'o ho hanoin no liafuan sira, maibé hanesan ho liafuan aramaiku “hanefa” ne'ebé, iha Testamentu Tuan signifika ema aat. Jezús nia eskolante loloos bele sai ema aat? Iha Jezús nia comunidade la iha fatin ba “juiz” intolerante sira no toos, ne'ebé buka nafatin ema nia sala ki'ik-oan atu kondena, maibé la preokupa ho sala no falla boboot sira – dalabarak grave liu – ne'ebé sira rasik halo. Ema ne'ebé la iha atitudo konversaun permanente no transformasaun an rasik nian la iha autoridade atu kritika maun-alin sira.

Finalmente, Lucas apresenta kritériu atu dixerne sé mak dixípulu loloos Jezús nian: nia mak ida-ne'ebé fó fuan di'ak (vers. 43-45). Iha kontestu ida-ne'e ita bele liga “fuan di'ak sira” ho Jezús nia proposta loloos: ema ne'ebé fó fuan di'ak mak ema ne'ebé iha fuan nakonu ho Jezús nia mensajen no haklaken ho modu fiél; no mensajen ne'e hamosu uniaun, fraternidade, partilla, domin, rekonsiliaun. Bainhira “mestre” ida nia liafuan hamosu divizaun, tensaun, dezorientasaun, domin ba an rasik, auto-sufisiénsia: kuidadu ho mestre sira hanesan ne'e, basá sira la'ós mestre loloos.